

צפניה

3 2 1

הפרק 1

דבר יהוה אשר היה אל צפניה בן כושי בן גדליה בן אמריה בן חזקיה בימי יאשיהו בן אמון מלך יהודה

²אסף אסף כל מעל פני האדמה נאם יהוה

³אסף אדם ובהמה אסף עוף השמים ודגי הים והמכשלות את הרשעים והכרתי את האדם מעל פני האדמה נאם יהוה

⁴ונטיתי ידי על יהודה ועל כל יושבי ירושלם והכרתי מן המקום הזה את שאר הבעל את שם הכמרים עם הכהנים

⁵ואת המשתחווים על הגגות לצבא השמים ואת המשתחווים הנשבעים ליהוה והנשבעים במלכם

⁶ואת הנסוגים מאחרי יהוה ואשר לא בקשו את יהוה ולא דרשו

⁷הס מפני אדני יהוה כי קרוב יום יהוה כי הכין יהוה זבח הקדיש קראיו

⁸והיה ביום זבח יהוה ופקדתי על השרים ועל בני המלך ועל כל הלבשים מלבוש נכרי

⁹ופקדתי על כל הדולג על המפתן ביום ההוא הממלאים בית אדניהם חמס ומרמה

¹⁰והיה ביום ההוא נאם יהוה קול צעקה משער הדגים ויללה מן המשנה ושבר גדול מהגבעות

¹¹הלילו יושבי המכתש כי נדמה כל עם כנען נכרתו כל נטילי כסף

¹²והיה בעת ההיא אחפש את ירושלם בנרות ופקדתי על האנשים הקפאים על שמריהם האמרים בלבבם לא ייטיב יהוה ולא ירע

¹³והיה חילם למשסה ובתיהם לשממה ובנו בתים ולא ישבו ונטעו כרמים ולא ישתו את יינם

¹⁴קרוב יום יהוה הגדול קרוב ומהר מאד קול יום יהוה מר צרח שם גבוה

¹⁵יום עברה היום ההוא יום צרה ומצוקה יום שאה ומשואה יום חשך ואפלה יום ענן וערפל

¹⁶יום שופר ותרועה על הערים הבצרות ועל הפנות הגבהות

¹⁷והצרתי לאדם והלכו כעורים כי ליהוה חטאו ושפך דמם כעפר ולחמם כגללים

¹⁸גם כספם גם זהבם לא יוכל להצילם ביום עברת יהוה ובאש קנאתו תאכל כל הארץ כי כלה אך נבהלה יעשה את כל יושבי הארץ

הפרק 2

התקוששו וקושו הגוי לא נכסף

²בטרם לדת חק כמץ עבר יום בטרם לא יבוא עליכם חרון אף יהוה בטרם לא יבוא עליכם יום אף יהוה

³בקשו את יהוה כל ענוי הארץ אשר משפטו פעלו בקשו צדק בקשו ענוה אולי תסרתו ביום אף יהוה

⁴כי עזה עזובה תהיה ואשקלון לשממה אשדוד בצהרים יגרשוה ועקרון תעקר

⁵הוי יושבי חבל הים גוי כרתים דבר יהוה עליכם כנען ארץ פלשתים והאבדתיך מאין יושב

⁶והיתה חבל הים נות כרת רעים וגדרות צאן
⁷והיה חבל לשארית בית יהודה עליהם ירעון בבתי אשקלון בערב ירבצון כי יפקדם יהוה אלהיהם
ושב שבותם
⁸שמעתי חרפת מואב וגדופי בני עמון אשר חרפו את עמי ויגדילו על גבולם
⁹לכן חי אני נאם יהוה צבאות אלהי ישראל כי מואב כסדם תהיה ובני עמון כעמרה ממשק חרול
ומכרה מלח ושממה עד עולם שארית עמי יבזום ויתר גוי ינחלום
¹⁰זאת להם תחת גאונם כי חרפו ויגדלו על עם יהוה צבאות
¹¹נורא יהוה עליהם כי רזה את כל אלהי הארץ וישתחוו לו איש ממקומו כל איי הגוים
¹²גם אתם כושים חללי חרבי המה
¹³ויט ידו על צפון ויאבד את אשור וישם את נינוה לשממה ציה כמדבה
¹⁴ורבצו בתוכה עדרים כל חיתו גוי גם קאת גם קפד בכפתריה ילינו קול ישורר בחלון חרב בסף כי
ארזה ערה
¹⁵זאת העיר העליזה היושבת לבטח האמרה בלבבה אני ואפסי עוד איך היתה לשמה מרבץ לחיה
כל עובר עליה ישרק יניע ידו

הפרק 3

הוי מראה ונגאלה העיר היונה
²לא שמעה בקול לא לקחה מוסר ביהוה לא בטחה אל אלהיה לא קרבה
³שריה בקרבה אריות שאגים שפטיה זאבי ערב לא גרמו לבקרה
⁴נביאיה פחזים אנשי בגדות כהניה חללו קדש חמסו תורה
⁵יהוה צדיק בקרבה לא יעשה עולה בבקר בבקר משפטו יתן לאור לא נעדר ולא יודע עול בשת
⁶הכרתי גוים נשמו פנותם החרבתי חוצותם מבלי עובר נצדו עריהם מבלי איש מאין יושב
⁷אמרתי אך תיראי אותי תקחי מוסר ולא יכרת מעונה כל אשר פקדתי עליה אכן השכימו השחיתו כל
עלילותם
⁸לכן חכו לי נאם יהוה ליום קומי לעד כי משפטי לאסף גוים לקבצי ממלכות לשפך עליהם זעמי כל
חרון אפי כי באש קנאתי תאכל כל הארץ
⁹כי אז אהפך אל עמים שפה ברורה לקרא כלם בשם יהוה לעבדו שכם אחד:
¹⁰מעבר לנהרי כוש עתרי בת פוצי יובלון מנחת:
¹¹ביום ההוא לא תבושי מכל עלילתיך אשר פשעת בי כי אז אסיר מקרבך עליזי גאותך ולא תוספי
לגבהה עוד בהר קדש:
¹²והשארתי בקרבך עם עני ודל וחסו בשם יהוה
¹³שארית ישראל לא יעשו עולה ולא ידברו כזב ולא ימצא בפיהם לשון תרמית כי המה ירעו ורבצו
ואין מחריד:
¹⁴רני בת ציון הריעו ישראל שמחי ועלזי בכל לב בת ירושלם
¹⁵הסיר יהוה משפטיך פנה איבך מלך ישראל יהוה בקרבך לא תיראי רע עוד:
¹⁶ביום ההוא יאמר לירושלם אל תיראי ציון אל ירפו ידיך:
¹⁷יהוה אלהיך בקרבך גבור יושיע ישיש עליך בשמחה יחריש באהבתו יגיל עליך ברנה
¹⁸נוגי ממועד אספתי ממך היו משאת עליה חרפה
¹⁹הנני עשה את כל מעניך בעת ההיא והושעתי את הצלעה והנדחה אקבץ ושמתי לתהלה ולשם
בכל הארץ בשתם
²⁰בעת ההיא אביא אתכם ובעת קבצי אתכם כי אתן אתכם לשם ולתהלה בכל עמי הארץ בשובי
את שבותיכם לעיניכם אמר יהוה